

5563.7
4012.1

v.1

詩

嘯阜先生文集元

BERNARD
LIBRARY
OF THE
UNIVERSITY OF
CALIFORNIA

Farmington - Korea

瞿皐先生文集目錄

卷之一

賦

叱石賦

危樓望北辰賦

乳爲生漣賦

哭子儀墓賦

詩

送周僉正景遊先生出守基城

夜寄金正字載清

江上斫鱸

辛引儀亭

暮泊北渚馬由陸行在南浦艱涉聚宿夜遇雨
奉別子悅仲氏

烏嶺

換龜亭

家有黃楊木字與鄰友抄印史記事未訖功還
京日迫吟呈同事李季賀上舍二首

椒井

行到樓巖無歸船見留二首

舟中九日二首

自珍浦遭風泊宿

夜計登程已浹旬悶甚有作二首

得鄉信子悅仲氏登程已數日喜賦

十月雨

送李遠期先生忠清都事排律遠期永成字

典 順陵祀寄 恭陵典祀崔子省子省見和

以未得聚會爲歎復前韻答之

雪來數日載清無詩賦此問之

與載清有守歲之約載清竟以 敬陵典祀出

去還寄詩輒和復期以更申前約

雲門禪師詩軸次鄭吉元韻

差祭 順陵公呈 恭陵典祀李正字廷瑞

差祭 光武馬止口號

載清寄詩將遊金剛山次韻以留

典祀 昌陵吟寄 敬陵李廷瑞二首

宋治叔有小杜之興賦此以嘲

金衣公子

顯陵贈宋治叔

即事

李君獻魚瑄之兩正字獨坐書寫房吟此呈似

載清寄詩說學射之樂和復

翌日偕宋治叔見訪再次韻

盧仁父醉過不入書來索拙稿

再次韻答仁父

次金內翰載清韻

題庚子同年槐院契軸

陪直西清月夜小酌醉甚就寢明日始知有投

詩聊綴一篇以記顛末奉呈校丈入案下

送慶尚都事姜仲寬傳

聞青鶴洞奇勝約柳克已同遊

詠黃精

傀儡棚

蜂衙

廣陵散怨

書堂剪樹

甲辰十月旬一出向書堂路中口占

十二日夜雨

十三日雨後露珠貫在梅枝蒲樹皓蘂恍若西

湖本色

南樓晚望

有懷

入城吟寄盧寡悔僚侍

和寡悔韻

送柳君克已

應製君臣同德

次止齋李伯喜渡臨津韻

次訥庵金郊口占韻

平山記所見

次止齋寶山途中韻

齊安館

次止齋中和途中韻

浮碧樓

次訥庵百祥樓韻

次訥庵記寒韻

次訥清亭贈康上舍韻

次湖陰韻三首

明皇文集目錄
四
次湖陰龍灣禊帖韻

次訥庵元日感舊韻

入車輦

安定館遇姜翰林順之夜話次順之韻

鳳山臨發登栖鳳亭

次權學官應仁韻

開城雜詠

渡臨津

自京發行到劔水道中有作示同行

至平壤寄朴僉正仲初忠元

伴送華使于江上回程義州牧使金醇之求詩

留別

聚勝晚酌洪叅判退之金同知仲任兩使相金醇之地主李學士伯喜話別

次訥庵慈秀山韻

次訥庵巖竇泉韻

林畔館

練光亭

宿大同館

泛大同江

南樓獨眺

見小艇捕魚

有懷

晚步二首

送金載清三首

晚出東湖

見李童子書屏二首

北風

夜聞警盜有作

梅雨

競渡怨

永貞郡校生謠

惜花春起早二首

卷之二

詩

酬洪宗百元海三首

昨晚見池魚有作在苞山

宗百遊毗瑟山寄泡豆

次東坡次孔毅父久旱已而甚雨韻二首

贈毗瑟山僧希淵

見仲氏病中詩驚喜之極率爾次韻

贈黃仲舉

送別

題涵碧亭

歌謠

寄濟民樓文會諸友

贈金司評明甫農

贈性天師

太守以詩見招拘病未赴次韻以呈

次太守遊觀韻十首

題孫丹陽汝誠畫魚軸

謝地主惠片脯

旅宿無寐追賦一路所見

送金生道盛還鄉

隆

送李君禮赴錦山二首義臣

送金舜舉宰龍宮四首八元

矗石餞筵和答李陶丘贈別

濟臣

陶丘欲賦詩請妓展紙且乞伴宿因戲呈一絕
初發晉陽道中有作

十九日朝雨

過安平嶺呈彥晦兼示澡兒

彥晦權
春蘭字

次矗石樓韻九首

無題

塚樹枝向南

鍾馗捉鬼圖

謝全君俞送魚舜輔

龜臺觀漲

贈僧

讀近思錄

應製慶會樓觀射

觀光錄

呈李書狀博祭濟臣

浮碧樓次李書狀濟臣吳方伯祥韻

浮碧樓席上

主席相公篇中屢示燕薊之行之苦慰藉甚款

聊拾蕪拙約同行李書狀同賦

昨者冒呈荒拙未見瓊報敢以戲語爲媒督之

次書狀韻

戲呈書狀一粲

次書狀途中韻

次百祥樓韻

次控江亭韻

數日睽違匪直傾慕弦心兼以瓊玖之阻爲嘆
今相聚累朝我心則降而江錦之裁收彩不
發殊非所望於左右敢先瓜投以希破慳
獨坐無聊呈清心高會博粲

登高會酒半酣成一律奉呈使相主人兩令公
分司亞使二契史求教

次書狀統軍亭韻二首

次書狀因怒有悔吟

昨朝飯罷見枉陋寢追說前夕渡江之景答以
一語便默而止心竊怪之而未敢問馬上覺
得殊有可笑者蓋夢應樂道月光之好說道
當時清致且語有來脉意味深長而僕反歸
美於蘆葦之長蓋俗語蘆與月同音不同聲
因鄙見之陋重聽之病而交誤之也今夢應
以暴怒爲悔深有愧謝之意余既有此失將
自謝之不暇故又步前韻以開慰焉

次書狀九連城韻

松鶻山

長湫道中次書狀韻

次通遠堡韻

踰高嶺

次書狀高字韻

次東昌堡路中韻

次宿西平堡韻

次清氛亭道中

留高平次書狀鎮武堡韻

元韻

次高平城始見毆西巫間山喜而有作

廣寧

夢應過楊將軍祠有作辭奇而韻險邈不可攀
敢於所押之外拾其餘字艱成十二韻以免
逋責

次上使山海關韻

次書狀望昌黎山憶文公韻

次書狀過孤竹廢城韻二首

宿永平府

次書狀薊州韻

到豐潤不許入城未卜安下處久立郭外用前

韻

謹次金蘭作契韻以塞勤教

次書狀王河館酌月戲賦韻

送李伯胤令公出宰真珠十韻

雨後行巡有述

次韻奉答瑞仲彥深兩年兄六首

海州芙蓉堂契會二首

答南景祥夢鰲

履霜堅冰至

聞女奚吹玉笛有作

慶會樓即事應製

月城二首

臨海殿二首

瞻星臺二首

鳳凰臺三首

除夜次琴堂奉夾之韻四首

續貂呈相公兼奉座上諸知契

次夾之韻

次仲氏韻二首

江陵校生歌謠

伏次仲氏韻

謝申生員憫葡萄

流頭之會偶欲共滌駿奔餘困不意梧亭丈人

聖得知之委送肉竹一坐驚感以爲奇事近
又傳來五言唐律一首曲盡當日景況乃知
閒中吟嘯之興又復不淺切擬因此捧心庶
得少效傾荷之情而調高韻強非久放筆硯
者所能攀躡頃嘗倅候答簡又示甓寺舊約
且慮缸面風味之變令人躍如而非直積漲
難越賤疾亦重坐孤盛意心之結矣如食未
下累日綴緝僅賡清製兼述卑抱用博閒中
一哂二首

凝石寺唱和二首

書凝石寺僧詩軸

觀漲

春寒

盆松

煎花二首

辭醴

思子宮

至天臺三首

奉答任卓爾夢中青眼之述
卓爾訖字

次卓爾韻二首

行淳詩軸次退溪先生韻

次南景祥

題李庾林亭

次南景祥贈別韻

奉酬南景祥知契相送以詩

野亭獨坐行衲投紙書所見

重陽翊日次子悅仲氏贈別韻三首

書性澄軸

仁宗大王挽章二首

挽南學正崧

挽尚牧申潛

挽柳舍人堪

挽李叅判瀼夫人金氏

卷之五
挽琴生員軸

退溪先生挽詞二章

挽李叅奉容配金氏

挽柳監司太浩景深

挽張袞仲母權氏

挽金生員士明

挽柳知事潛

挽李監司仲樛

挽江華府使全聖俞

舜弼

挽亡室貞夫人權氏三章

挽鄭承旨子中

惟一

卷之三

序

風騷選序

睡軒集序

跋

尊堯集跋

記

江界府晦齋先生祠堂記

榮川鄉校重修記

書

上左相安珰書

代紹修書院有司上戶曹書

答星州牧使盧慶麟書

上禮部主事書

雜著

代人請立鼎山書院文

擬遣韓愈宣慰王庭湊詔

本朝謝遣還漂流人口表

四皓有無辨

紹修書院畫像改修識

題芙蓉堂契會圖

鄉校歌謠

策問

祭文

親祭社稷祈雨文

祭王太祖祈雨文

祭兵使金秀文

伊山書院奉安退溪先生文

祭先祖文

祈雨祭文

卷之四

碑銘墓誌

皇明高麗國行奉順大夫判典校寺事右文館

直提學 朝鮮國贈大匡輔國崇祿大夫領議政府事朴公墓碑

高麗國推忠亮節宣威翊贊補祚功臣壁上三韓三重大匡領三司事原川府院君邊公墓表

贈通訓大夫通禮院左通禮奉直郎洪州判官朴公墓碣

洪州洪君墓碣銘并序

有明朝鮮國贈大匡輔國崇祿大夫議政府領議政兼領經筵觀象監事行活人署別提奉正大夫盧公碑銘并序

安東金公墓碣銘并序

令人李氏墓誌銘

舍人柳公墓誌

生員宋公墓碣

瑞山郡守金公墓碣

有明朝鮮國貞敬夫人洪氏墓碣銘并序

吉州牧使李公墓碣銘并序

司憲府監察田公墓碣銘并序

嘯皇先生文集目錄終

嘯臯先生文集卷之一

賦

叱石賦

嗟余季兮朝出牧日之夕兮不見還斜風細雨兮何許
倚門閭兮眼長寒邈形影兮參與商奄星霜兮四十年
勤南北之搜剔喜青藜之我先丹崖千丈兮琪樹綠隔
凡區兮幾重雲徧深兮紫霞鎖靈虬吠兮愁塵蹤石屏
兮半啓驚面目兮無乃是執之手兮粲一笑渠胡爲乎
窮山裏幻盡世間之語音殊非昔日之風骨多年鬱陶
之腸煎贅然相看兮兀兀彼此寒暄兮何言問先及於
爾牧天風颯兮綺語霏仙袂指兮山之東磷磷磊磊之

滿目但山骨之橫縱點檢陂陀之頑物非復曩時之毛
羣豈料夫穢腸之三易飽瑶草兮臥雲劃然叱咤之一
聲訛暖沙之間眠繽紛彌壑之雲根隨一呵而駢闐奮
長鬣兮振柔毛奄前驚而後躍盈前頭角之濺濺孰非
向來之鑿鑿夫誰謂爾無羊兮謬維羣之維億昔爾之
求牧與芻不過應門之五尺荷短蓑兮晨復昏橫晚烟
之一笛今胡爲僻界之蟬蛻弄變幻於壺中緬立羝於
左氏聞化石於黃公嗟爾術眩視而駭聽無乃學羽人
之鍊道乾坤別兮梨棗熟日月長兮春不老胡麻茁兮
瓊圃碧白石粲兮仙羊肥信偃仰之可樂夢詎回於塵
機然戴高履厚之人生恐未可若是之誕漫上父母兮

下妻子恩昊天兮義丘山何必爲異物之所牽悖秉彝
之懿德矧畜生無失其時要以興村巷之窮業寒衣飢
食之是資仰堪事兮俯堪育年年朋酒之曰殺豈非門
闥之樂事胡捲盡劉安之雞犬納粟中之天地雖任情
驅牧而不自覺吾恐魑魅之爾伺嗟嗟余季盍歸乎來
寥落洞天翠嶠屏回故園千里塵世幾春涼涼孤影石
羊爲鄰叱罷風頭山鬼響答音容一朝能不驚惕斧柯
忽爛半天斜日

危樓望北辰賦

余杜陵之布衣兮嗟老大而疎愚身竊許於稷契兮世
何遭此艱虞乾坤含兮瘡痍日月老兮逆旅飄蓬轉兮

劍之南邈故國兮何許登仲宣之高樓兮自伯仁之山
河偃宵寂而悠悠兮凭危欄而興嗟聞羣籟之收囂兮
淡天宇之寥落戀已切於行在今眼自及於北極魁樞
晰其入望兮起孤臣之感激增余衷之懸懸兮若午葵
之傾日向遙光而相對兮庶照余之寸丹揮老淚而危
坐兮獨中夜而潛歎曩予志之脩塞兮擬堯舜其君民
今胡爲乎瀕落兮客萬里兮十春秋風號以鼓怒兮捲
三重之屋茅雪亭流而射天兮櫓槍赫其貫霄白日忽
其西側兮事有甚於去邠哀大平之黎獻兮塗肝腦於
荆榛氣象慘兮驚心風景悽兮盈盱彼蜀帝之冤魂兮
勞余拜之僂僂矧君象之孔昭兮邈余望之曷已辰縱

遠於九萬兮貢吾誠兮尺咫擡白首兮斯頻望眼寒兮
天一方懷芹曝之微志兮詎一息之敢忘噫有心而無
路兮難轉地而旋天把明鏡而頻看兮歎勲業之不前
孰知余心之所憂兮反謂我其何求獨徙倚而延佇兮
哀共我者伊疇風雲曉以四起兮恐孤光之湮翳然否
極則泰來兮豈亡胡之無歲安得一挽其天潢兮廓妖
氛而快洗整北辰以居所兮環衆星其咸拱致台階之
再平兮兵倒載而不用伊余力之不任兮仰有愧於照
臨欲忘世而自娛兮柰乖忤於初心哀余心之斷斷兮
徒悵仰兮何其嗟此誠之不達兮惜此志而無遺塊獨
吟而到明兮撥深懷於短辭亂曰江山雖靜戰塵紛兮

望天有星顧國無君中夜孤臣淚不禁兮百年此身萬
里愁吟半世行藏雖有命兮拱北寸心元耿耿兮

乳爲生漣賦

噫世情頑薄之日滋紛數倫之相尋平居尚慢於事主
孰危難而盡心漣流乳而育孤偉克忠於所事善也李
家之蒼頭遭奇禍之沓至殞怙恃於一瘍餘襁褓之塊
肉悲門祚之將斬寄千鈞於一髮彼羣隸之饕貨欲信
然而反噬痛鉅牙之流涎顧縣力之難禦吾有背兮可
負彼有地兮宜藏奮義袂而脫險保千金於已亡然髮
燥之纔月無慈母之乳哺思戴育之無術悶啼飢之呱
呱納孺尖於黃口姑慰安於斯須俄舍吮之未幾驚白

汁之流出始一脉之開竅遂連涓之相續彼產婦之乳
少藉藥力而猶艱何男子之硬膚乃滲漉而不乾知忱
悃之內篤肆奇效之外望將胃中之寸赤注彼兒之心
上既一體之無間宜津液之流通需餒喉於幾燥填弱
髓於將空養寸草於春暉蘇枯苗於甘澍懿生漣之殊
感曠百代而無伍豈口體之徒養抑禮敬之兼盡時腹
我而飲罷每稟承之惟謹擬嚴君之在上是拜跪而唯
諾自孩提而匪懈逮成立如一日剪逆儔於故居恢青
氈之舊業騰異事於九天煥寵擢之兩及綯畫錦於五
馬誠益專於舊主至親鉏而躬爨罄哀慕於抔土嗟夫
人之義烈心可貫於金石不改柯於夷險寧卷席於窮

達尚動天而感神又何怪乎渾生想當時之淋瀝知噴
泄於血誠孰謂編戶之厮養紛獨有此至行遺君後親
之比比儻聞風而竦警茲闡幽於遺傳揭轟雷於銅聽

哭子儀墓賦

戎車載指於蜀棧六師左次於華陰胡然李家之元帥
動哀感於荒林撫抔土曰爲爾祖盡哭擗於一畝原厥
情之回譎諒奸計之至深際亂離而攀附奮賤跡於蹄
涔效走狗之微勞擅權寵於朝簪嫌門地之湫卑未凌
駕於當今甘媚竈之佞舌愜誇世之侈心伊啓行之前
途實豐碑之舊岑旣自託於蟬聯寧小緩於躬臨喜罔
人之有地迴駟介之駸駸進且拜而且哭奄涕皆之雙

淫嘔虛聲於老喉挑妄悲於奸襟發詐慟於晚壑驚睡
猿於烟沈攢峯爲之竦誚石泉爲之鳴啗矧軒天之英
靈詎非類之顧歆痛惡聲之相加已陰誅之侵尋斯舞
術之巨魁噫寧馨之誰妊卑厥祖而掩諱敢冒姓於同
音肆欺誣於白日至強哭而矯忱口有聲兮眼有淚徒
趾方而首黔面無慚兮心無恥實乃獸而乃禽禍忽生
於計工諒天討兮非人擒洗醜辱於墓道孰彼蒼之難
諶反告身而謝狄歎青也之足欽苟具瞻之不僻縱寒
賤而誰禁背厥行而盜厥姓蒙假鐵於真金喭僞哭之
誠愚聊奮鉞於一吟

詩

送周僉正景遊先生出守基城

辛丑

一棹風蒲漢澣舟千林烟雨嶺隈秋捲將北斗當時望
專付南天百里州宇宙窮通男子志君民進退古人憂
乃家千載風流遠重見南康舊姓周

夜寄金正字載清

漢

偷閒數日臥炎蒸斲竹無功汗自凝千里鄉山雲入夢
一窻書史月爲燈浮生草草長冰槩世事紛紛聞鷄鵬
何用寸心關是物剗愁寒刃荷詩朋

江上斫膾

豆毛名浦漢江頭綠樹疎籬枕古洲細雨釣筒蓑笠暝
秋風漁戶笑談稠銀梭僧踣青錢重雪縷香凝白飯柔

却憶東明門裏去何曾片夢辦茲遊

辛引儀亭

文司成敬全曾過此亭賦一絕云一聲清唱隔桃花以授之亭主出迎歡飲

佳境藏林古榭新桃花清唱想芳塵滄浪影浸珠簾晚
楊柳陰深繡閣春霞爛花心紅鎖岸風輕鶴背白橫津
空亭未解留行客物是知非舊主人

暮泊北渚馬由陸行在南浦艱涉聚宿夜遇雨

小奚牽馬傍南陸客舟避險巇岸北陰雲驅日日已落
藤林蔽程程更黑蒼茫相阻欲聚集天塹難超地難縮
不辭移棹于彼泊荒野人稀饒草竊欣逢橫渡一葦葉
篙師撐截洪流碧接取雙鴛擬利涉驚蹄不慣中流楫
懸身柁外寧沒鬣未甘木道高著脚前牽後叱僅拯溺

白石多處汀頭繫衣裳濕盡愁飢僕更爲守望須露宿
星河隱見雨意迫火光四掣金蛇躍船頭倚睡心兀兀
臨深魂夢兢易覺暗響俄驚沛然作不忍肩蓑環抱膝
漫漫秋夜幾時日寸寸強弓挽未得人主到處有憂樂
難易夷險紛不一一夜艱危頭欲雪窮鬼隨人動相扼
遠雞呼起始蘇息前事欲說毫已死

奉別子悅仲氏

余要見金子任獨由烏嶺○仲氏
諱承佩中辛卯司馬同庚子文科

一家同榜世稀聞作伴還鄉士所云丹陛聯辭
天北極秋風同望嶺頭雲漢津微雨鷁飛並達水斜暉鴈影
分獨指迂程離恨劇營堂先把壽杯醺

烏嶺

愁攀層石綠陰中鳥道高高入半空萬里乾坤飛遠目
片雲霄漢逼冥鴻路通南北輪蹄接關控襟喉氣勢雄
匹馬短衣經幾度依徕曲曲舊行蹤

換龜亭

七十星排嶺外州一龜留鎮幾回秋逐年交迓金腰相
千里遙分玉食憂雲棧高低區界遠瓜期新舊古亭
幽閑人傳舍分明記某也剛嚴某也柔

家有黃楊木字與鄰友抄印史記事未訖功還京
日迫吟呈同事李季賀上舍二首

文章司馬史家雄明燭千年暗夜中汗漫諒難尋首尾
抄謄聊擬啓盲聾莫辭少費三餘力可忍終虧一簣功

成就新篇螢雪下卷舒應失向來慵

夢斷南窗客况清清虛夜景月三更露寒蟲吊聲聲苦
天靜星芒點點明印史新功來挂慮辭家遠別已關情
同心共力慚先負有志堪憑事竟成

椒井在榮川郡北

山中石井井中水水味如椒色如冰冰冽椒辛兩美合
宇宙流火斯嚴凝冷然石縫珠走鏡紫膩浮面霜華蒸
天留奇水不容祕異事萬口人間騰扶持輿馬日千指
帷幕窩鋪紛相仍攢膚亂粟隨所浸寒股自戰時凌兢
湔袂塵根蝨賊空潤色元氣真源澄如飢得食醉得醒
向來橘井難自矜一解東華塵裏衣身輕試欲招鶴乘

行到樓巖無歸船見留二首

留人三日樓巖主主不留人人自留籬下江流迷倦眼
夕陽山色赴幽愁中原今古繁華地客子行藏逆旅秋
獨撚短髯誰解悶虛懷且可對漁舟

背山臨水三間屋忙客非因好景留朝霧夕烟皆長物
清波白石祇生愁仲宣樓上鄉關夢宋玉辭中草木秋
載我不能西路送千帆無賴繫汀舟

舟中九日二首

霜研猩血染江楓露洗金錢點菊叢佳節知從何路至
四回巖岫隔千重

兄歌弟舞開高堂手摘階花泛壽觴此是吾家好風采

夢中猶記興陽陽

自珍浦遭風泊宿

東歸曾與東風戰，逆浪牽船苦難轉。
心期他日返旆來，千里可借劉郎便。
那知風伯似陽鳥，秋深却指東歸道。
東來西去本無心，肯憐孤棹愁衝冒。
嗟吾豈樂入塵中，安得回帆隨順風。
朝炊夕宿一望際，造物無窮吾固窮。
夜計登程已浹旬，悶甚有作二首。

乾坤逆旅寄長程，坐盡階蓂十葉生。
入洛船知何日泊，思家詩向此時成。
隨方礙目山如戲，到處尋人月有情。
未解澆愁江謾永，灘聲揚抑夜三更。

獨向千山萬水中，
搖嶺表斷根蓬衣裘日久饒蟣蝨。

枕席更長足露風旅夢易飛雲共遠愁腸難洗酒無功
暗香時到船窻細岸上應開菊一叢

得鄉信子悅仲氏登程已數日喜賦

鵲噪徵今曉燈花記去宵書傳黃犬急路接白雲遙鴻
鴈隨南北墳麓在暮朝西齋須洒掃相待共陶陶

十月雨

乾坤暝色十月霜淒風帶雨鳴高棧落葉生驕恣翻覆
寒聲掠砌摧如剗窮儒四壁衣裳單歲華逾盡情難限
半間冰突黔未得悶見蛛絲封破蓋癡妻嗔我爲計疎
空向虛窻披蠹簡兒女焉知窮達理萬事在天堪一莞
陽春應續江寒後可忍須臾且閉眼

送李遠期先生忠清都事排律

遠期永成字

馬韓玄古舊乾坤盤截青丘地勢尊二嶺南雄鍾淑氣
一江西闊濬深源幾番蝸角紛瓜豆此日金甌囿翰藩
高下城池幕布局縱橫并邑蟻成屯山原雞犬人烟鬧
海澨漁鹽土物繁調度尋常資費用腹心咫尺倚墉垣
登崇偉望專方面宣歙汪恩固本根制閩分憂權自
重觀風問俗任殊煩幕僚肆要兼人選朝著由來異數
掄凶早矧伊尤緊急叅謀豈直贊平反誰膺今代材通
敏共道君侯玉粹溫萬卷詩書長算富四方弧矢壯心
存聲英譽茂閒鱗躍選妙班清備駿奔郎宿笑他唯出
宰使星今見副周爰器堪所試攢人賀用適攸宜快物

論再拜 九重金殿邃一鞭千里馬蹄翻都門祭祖軒
車簇凍雨清塵物象掀鴻跡雪泥離恨遠清風勁氣一
杯吞仙舟行色煩瞻望漫叟風流想歷捫遠岫遙岑迷
上黨村花官柳暗中原月山涼入迎薰畫雞嶽青分聚
遠昏花落古巖春自老椒涵神井鑑無痕重飛觀寺松
坪跡續駕礚溪亂谷轅二樂山川寒碧笛雙清風月亦
登樽檐帷指遠還回近頸脰衝寒更冒暄銀燭花筵迷
醉眼錦囊椽筆蕩吟魂身閒伴憩棠花蔽興溢隨看竹
馬喧剩得雲飛川泳樂果非晨入夜歸門好輸蘊素窮
遺策共扇陽和煦僻村幸識荊州窺管豹濫塵槐署接
班鴻欣瞻遠佐詢謠寄自愧遲酬育我恩誰借霜蠅攀

電驥有同籬鷄望溟鯤臨分落照紛抽思稽古當時慕
贈言到處身謀防伐性趁時王事首伸冤會看瓜遞
歸來日秋宇霜清鶚影騫

典 順陵祀寄 恭陵典祀崔子省子省見和以

未得聚會爲歎復次前韻答之

子省蓋國字

殘年黃葉滿幽蹊淅瀝秋聲起馬蹄雲入半間分宿客
籟乘清夜下空溪林泉一夢魂俱爽塵土多時首共低
咫尺相思不相見非關天塹限東西

雪來數日載清無詩賦此問之

前宵糝徑雪一尺君家應似吾廬縞天工豈肯虛費巧
剪刻方知用意老詩人坐嘯塵土中風骨無由蟬蛻早

不須遙辦玉京遊且向席邊粧點好輕風吹下萬頃銀
幻出瑤臺插瓊島睡回身在畫中天俯仰殊觀驚欲倒
襟靈欲冰沆瀣寒坐失向來烟火惱滿眼無非好詩債
引興撩思紛鬪巧詩人無乃浩難裁怪底多時悶天藻
坡翁剽得海市助老筆添豪留世寶如今厚餉徒負了
我怪詩人人亦道起陸龍蛇久延佇探支花月旋如掃
陽烏無賴不饒君奇事休教虛界昊貧交忽動剡溪思
良賦走卜開襟抱丐公殘膏困載來長枕一夢春塘草
與載清有守歲之約載清竟以敬陵典祀出去
還寄詩輒和復期以更申前約時載清被推落職
挂冠畢竟逃何處閒住須知此一時世路蠻蜩看已熟

名場塞馬失何悲，衝星冤滯須雷煥。流水絃高待子期，
曾結詩盟盤共軟。春風捨我欲焉歸，欲乘閒遊金剛山故及之

雲門禪師詩軸次鄭吉元韻

惟吉

青鞋布襪平生志，蓮社苔蹊擬獨尋。一落塵鞿纏蔓緊，
若耶溪上恐春深。

差祭 順陵吟呈 恭陵典祀李正字廷瑞元祿

衛泥倦馬不辭鞭，破帽輕風澗水邊。花借餘春明晚壑，
草隨新雨遶平阡。青山面熟人頻到，好酒交疎景謾鮮。
望斷梵宮天咫尺，塵蹤無路可黃緣。約同過大慈寺余獨相違

差祭 光陵馬上口號

身困夷塗盡險程，渡頭時愛鏡光清。閒雲馬首歸飛急，

又失前山半面晴

載清寄詩將遊金剛山次韻以留纖錦體

磨新玉鏡挂中天笑口開須趁少年斜日落霞明小洞
近山蒼樹幕輕烟花春麗句裁誰共雪壑幽蹤走底緣
家近幸容從醉醒多時此興好留連

典祀 昌陵吟寄

敬陵李廷瑞二首

是日冒雨晚到

披蓑竟日欲肩頰夜枕寧辭倦脚橫萬木四窻鳴葉雨
短衾孤夢照愁檠行頻馬首東西路閱盡人間冷暖情
磊砢曾邊雋有酒怪禽時送兩三聲

人間無事不勞形暫脫塵喧骨欲醒遠靄半遮山面黑
暝烟濃染雨絲青難酬詩債空回首先破苔封想掩碣

聞說節推相待久晚來空復詠雲停

宋治叔有小杜之興賦此以嘲

安正字善應有采桑小兒治叔託以

月夜設酌招致翌日日晚不送故詩中及之○治叔贊字

一夢瑤臺路不通尋芳餘恨屬遊蜂金因好事投桑下
王爲知音出石中對月三人終短夜醇醪一盞醉春風
天明任却蠶飢盡頭畔衣裳著更慵

金衣公子

仕退聞庚子司馬同年拜謁于玉堂玉堂出題以金衣公子效此

上苑光風泛霽暉唐家公子恣輕飛梨園調舌春絃滑
金穴抽身晝錦輝碧掩紗窻深柳幕紅酣玉頰媚花妃
豪奢服美休矜眩一夜秋霜下禁闈

顯陵贈宋治叔

余以愚晨執事先往聞辛致遠繼至明日見之則治叔也篇中及之

見聞豈意殊今昨入戶翻驚鐵石腸等是可人斯厚契
幸臨佳境更閒房風聲挾夜穿林迴月色隨窻印簾方
珍重兩宵連臂話古人曾說百年長

即事織錦體

門關久絕客人干獨坐清吟一日閒軒靜對叢新竹瘦
牖虛來響細泉寒翻翻白葉掀風樹靄靄青烟帶兩山
魂爽晚涼微起簾存心古卷把書看

李君獻魚瑄之兩正字獨坐書寫房吟此呈似四館

古風上官坐處下官不得冒
入○君獻名瑄瑄之名季瑄

好句閒軒畫檻臨簾鈎四面對開襟桐陰落鏡塘心靜
烟縷橫屏出色深簷角風微鳶送嘯林梢雨捲鳥繁音

頸勞左右難酬債能記塵茵俯首吟

載清寄詩說學射之樂和復甲辰

半醉歸來一睡餘挑燈盥手啓君書空傳麗句誇閒事
未見高軒過弊居排闥好風鳴壑遍可庭明月出林初
故人已奮桑弧志多病還慚櫟散余

翌日偕宋治叔見訪再次韻

洞府無塵興有餘吟窻時復喚中書非吹靈籟生清夜
如畫青山繞燕居君在鄰牆交白面詩來句法逼黃初
況今朋酒消長日槐院春曹共訪余

盧仁父醉過不入書來索拙稿仁父慶麟字

養病動數夕客榻塵不掃入戶雨隨風君書來喜早青

山共眼明曉雪消
冗惱風流過門夜
追想醉帽倒天街
一尺埃隔甚鵲橋
道素榆已佳晤人
猶舊阻抱驪龍不
曾睡偏惜頷下寶
却要覆瓿費催徵
敝帚稿何異飫豢
牢試口及惡草序
邁大地秋涼入壁
水藻沆瀣洗天眸
奩匣啓晴昊莫學
丞負余松陰事正
好疎篁然數枝寒
影早不槁恨無凍
樽綠正色相叅考
須君揮洒手物色
移魯縞

再次韻答仁父

琢句火讓急千軍
塵獨掃炊沙抵黃
髮公乃得之早客
夢戀鄉并坐被節
物惱蔓纏草澤我
局束甚懸倒步月
立清宵儻與知者
道眉開入手詩紙
上見襟抱愧把魚

眼賤橫市蚌胎寶仰高思巧馥覺穢欲焚稿歲極長養
功庭有交翠草行與鵙鳴近物色須品藻小窓風乍清
挽人到羲昊端宜著新鐫鑱隨醜好何惜一先登談
笑試拉槁槽牀久生魚旅愁眞壽考擬借喉舌醞入關
仗素縞時載清爲注書欲借酒也

次金內翰載清韻

秋雨朝連夕輕風亂玉麻寒聲搜樹急遠色映山斜俗
慮清襟韻炎氛洗物華退公金太史應墊角巾紗

題庚子同年槐院契軸

三五聯芳一桂春槐陰同作鍊形身鯤飛鵬化曾庚子
鷺列鵷班已甲辰雲雨忍論新變態湖山欣照舊精神

仁川篆繪咸從隸事勝盟堅兩不磷

陪直西清月夜小酌醉甚就寢明日始知有投詩
聊綴一篇以記顛末奉呈校理丈人案下

季夏十三夜直廬同倚樓樓窻得好月厚餉慚未酬起
來各就寢欲寐如有愁驚看玉鏡光尋我入簾鉤照我
一片心不覺回青眸有如金石友相逢久別秋主人視
如新友意猶綢繆孤情不忍捨到處輒相求感歎共驚
起展席前楹幽呼兒具小酌撥我清興悠銀桃擘鵝黃
椒桂香浮浮寒冰助冷淡爽氣生襟喉酌月謝前慙月
喜不我尤但道莫停手以永今夕遊時聞荷蓋露瀉落
鳴琅璆樹影明若畫滿地蟠蛟虬成行菊百叢嫩葉添

新抽微風過西牖竹間來颼颼物色乘半酣獻狀不待
搜恨無一聲笛吹裂碧瓦溝唯將忘吾我靜對忘言儔
兩忘月與酒沉復數更籌頽然銀色界飛夢登瀛洲仙
翁落玉唾試我能勤收凡眼非全醒却自驚暗投仙翁
忽不顧獨玩金波流起來問何祥有句在案頭沈吟始
大覺不敏甘包羞回思已隔晨陳跡挽不留轉恐遂泯
沒聊續問月謳

送慶尚都事姜仲寬偉

風前駟騎電飛過嶺上天低手可摩七十城池分洛水
一千文物問新羅芙蓉幕靜樽盈酒楊柳腰輕眼眩花
醉裏莫教容易聽紫芝春怨隔窓歌

聞青鶴洞奇勝約柳克已同遊

克已堪字

槐下形骸忝璧聯同牀却是隔原川
偷閒事好遊方外挽我君能到酒邊
塵土光陰催夏五風烟笑語屬秋千
州錢粗俗還非分騎鶴何妨入洞天

詠黃精

黃精草中靈本草收第一異根未易斲
前言且可悉幽谷二三月仙苗自抽出
豆花青白細竹葉兩兩匹莖柔類桃枝
子潔近黍實拳大與拇小肥瘠隨土質
旣限採取節還精劑造術一煮再煎止
九蒸九曝畢團圓餅如錢甘美脯勝術
節乾宜飲屑掇鮮好茹筆得益五六斗
見鬼三百日筋骸旺神助榮衛鍾陰隲
飢渴蛻塵白炎

涼軼歲律坐覺身漸輕行看步已疾層崖仰萬丈一躍
不轉膝幾閱乳臭兒老死埋土室海波自主桑兩鬢猶
抹漆神功若符契灼灼難備述淵藪一寒女凡骨亦已
失有耳共聽瑩顏齡制可必我有木柄鑱玉簪何處出
無緣充食飲洞天雲鎖密不如味道腴無夭有安逸

傀儡棚

機關種種電驚忙造化居然失主張城下闕支猜婀娜
筵前鮑老笑琅璫媚如山鬼揶揄態捷似林鼯歛閃狂
棚上一場撩亂夢東風吹散竟茫茫

蜂衙

臺高廉陞峻衙集董臣工令信如潮汐誠勤冒雨風探

香回翅急課蜜釀脾豐得秀猶耽逸天機深小蟲

廣陵散怨

華陽亭中月照人深趣獨許桐絲伴古音飛到仙客耳
步虛一聲回夜半千年珍祕渠可語挽入妙境同一祭
山高水深屑霏霏更煩膝上凝一亂初驚異譜撼神觀
細推奧意流一段千年麥秀歌過殷萬里銅仙泣辭漢
天翻地覆屈指中一境山河塵土漫區區虛費支厦計
怨入悲商悽不斷分明興替曲中論不禁一唱茹三歎
丁寧莫遣俗子知只許襟懷自娛玩指端坐失舊繁腔
精神脫然醒如喚歸來獨立萬物表雅思入玄徐轉腕
聚散離合理冥冥昭然間向絃上看悠然身世付微調

目斷歸鴻世自換，傍人不解獨詣妙。擬趁指南尋畔岸，
日色忽向東市慙。袖手自發俱亡惋，仙韻居然閉九京。
幽窈鬱抑琴心貫，知音韓也真可人。止息遠意曾一贊，
後來士或蓄無絃。高臥北窓能避難，昧却抽身倚伏中。
恨君徒知廣陵散。

書堂剪樹

解事應嫌洞壑空，植根培種遍西東。多年雨露叢叢長，
起陸龍蛇箇箇雄。長夏濃陰增蒼蔚，畫樓層檻巧牢籠。
山移窄窄幽屏外，人在重重翠幔中。蒸鬱祇添炊甑甚，
寂寥真與面牆同。塵間已費譏評語，罷難遲剪伐功。
樵豎身輕猿自挂，鐵鎌鋒利月新龔。丁丁忽捲屯雲落，

坎坎平開隔障通太守應驚柯郡夢厨兒收續桂薪窮
指揮已仗高明手變置渾欺造化工恢拓海天開古鏡
鉤回沙水納蒼虹簾虛剩聽紫巖澗谷豁專輸滿榻風
削跡蟬聲歸別柳失巢禽語萃疎桐四無拘礙旁招鶴
一快登臨俯送鴻異境幻來疑易地幽襟蕩盡似開壟
從今大臥寬閒界追伴曾吞八九翁

甲辰十月旬一出向書堂路中口占

寒空斜日在吾西山石穿成詰曲蹊松下樵蘇收落葉
澗邊行邁避衝泥偶逢歸客停鞭語遙見村籬傍岸低
踏盡平沙天水闊飽風無數夕帆齊

十二日夜雨

庭喧秋後葉客坐雨中宵窗薄添清絕燈孤照寂寥鴈
聲回渚急泉響出林遙故事流觀盡長懷不自聊

十三日雨後露珠貫在梅枝滿樹皓蘂恍若西湖
本色

巧綴寒查上輕盈萬點繁分明新玉色隱約舊芳魂絕
勝丹青事殊無蠟蜜痕西風莫相妬小待月黃昏

南樓晚望

南樓獨坐暮天長江水烟籠遠渺茫沙靜庭柯橫瘦影
簷低山月礙清光驚龍亂吠疎林外醉媪行歌小澗傍
遙望美人思宛轉不知寒氣襲巾裳

有懷

天上瑤池宴佳人醉未回階前數叢菊空自冒霜開

入城吟寄盧寡悔僚侍

寡悔守慎字後改號蘇齋

千年古鶴仙格瘦栖向秋江江上樹霜淒月苦孤夢冷
清唳曉徹終南霧病鴈陰崖忽驚睡翹頸敢願同方住
羸形未蘇翅翎短西風晚嶺愁難度翩翩數日試戾止
半道與鶴還相遇鶴尋舊巢已言歸鴈慚滯迹將情訴
鶴憐鴈意太丁寧許以重回伴歲暮分飛殘照影南北
鴈到空栖塊獨寓煙波渺茫隱青林錦葉隨沙鳴宵雨
洒然已失稻粱陋益思整翮聯仙羽羣仙忽集太清宴
胎仙夜醉金莖露雲間杳杳君不來人間依依鴈回顧
鴈回又負鶴歸期珍重消息傳空屢終教有聚無散心

長散未果成一聚爲報鶴歸且休嗔鴈亦行尋前去路

和奉鐵津尊史

寡悔

十月東湖寒色深搖落眼前丹楓樹節敘不饒日夜
隔愁思寂寞江天霧伊齋病夫光山人曾莽尚欲三
冬住臥穩慵起冀一睡自嗟平生少風度鐵津其來
磁我恫憐我不以衆人遇仰喜輝光照枯朽且得展
却中情訴國家成就人才多欲令益朝而習暮職
事營營思慮紛特開靜室於焉寓廩繼內多寵無
右感激偏霑沛然雨日見發外有英華更聞鱗代南
溟羽愧我頑鈍難剪拂敢與詩賢爭月露文場已覺
忝論議講筵其如負臨顧而今沐漆欲求解猶

幸警教不憚屢此意未吐將如何人世難逢暫時聚
隋珠擎來慰孤襟悵望青門迷歸路

和答寡悔韻

美人消息自書堂遠帶烟江晚色涼車馬風埃醒昨夢
詩書燈火醉閒房暮雲漠漠山遮眼窮巷蕭蕭雨滌場
莫怪俗緣磨不盡寸心長在古梅傍

送柳君克己

乙巳

榜契僚盟忝四同君今此去我心忡堂中好樹忘憂草
塞上行爲得馬翁故國音書宜數數炎程行李戒匆匆
長材試險非無意會有圖南九萬風

柳君克己與余同庚子桂籍而在槐院數年入翰苑

歷銀臺皆得附尾而同席焉故相知最深今朝廷
以北門郵務疎虞欲剋弊而難其人柳君膺首選得
之彼而失之此知柳君者共惜之也柳君家有孟氏
一樂而郎罷又在大夫之列其教子固欲不計夷險
以移孝於國矣但天只宿患風痼而密密之縫不能
無軫于慈念則遠離膝下亦人子所難爲懷蓋在公
則重而在私則切私之切者不足以勝公之重而雖
重於公者又不能使之忘其私之切者則謂柳君無
去住之恨不可也余於柳君也知之深而惜之甚當
勉其所重而紓其所切故贐以一律而跋此數語於
後俾柳君慰焉柳君前日之孝爲今日許國之忠而

今日之行又他日永言孝思之地柳君其勉之

應製君臣同德

尊卑定位化流通上下相交泰運隆會聚精神魚縱壑
應求聲氣虎生風始終已保心惟一吁咈須知道則同
蟻蛭小臣歌 聖德涓埃無路補高穹

次止齋李伯喜渡臨津韻

伯喜首慶字

山下孤亭亭下津輕舟載過倦遊身江湖風物曾聞慣
鷗鷺烟波喜見親崖壁驚回東望眼笙歌更說太平春
林臯隱映開閒徑谷口方知有子真

次訥庵金郊口占韻

洪暹時爲遠接使

短垣窺返照叢木戢寒禽驛古多風戶村貧寂夜砧思

親生白髮戀 闕耿丹心恩義難輕重幽愁抵海深

平山記所見

興義來亭午金巖過落暉馬尋穿樾路村掩鎖烟扉赤
埴驚殊壤清波愛小磯平山山益秀一帶畫屏圍

次止齋寶山途中韻

山河渺渺馬駸駸疑瞻幾苦吟歸夢自迷千嶂外
愁腸難寫一杯心虛名愧我榮仙幕妙選多君拔士林
寫盡兩章遊子恨句何清絕意何深

齊安館

中遠沙土苦填喉入郭山光慰遠遊潦倒書生慚白面
崎嶇客路已黃州銀鉤簾捲清歡閣畫棟風高廣遠樓

更喜臭蘭人作伴如年永夜好同稠

次止齋中和途中韻

佐時收闕茸當事愧糊塗作客愁衝雪停吟懶捫鬚關
山行李遠燈火此身孤斗覺衾如鐵驚飈夜自呼

浮碧樓

危磴千尋控畫樓平看百里聚雙眸長江有汜環孤島
層壁成城繞古洲天末峯低雲幾疊檻前松老鶴千秋
登臨正值冰拖雪恍泝銀河犯斗牛

次訥庵百祥樓韻

林平野迴客登樓密雪層冰水伏流地控襟喉盤古鎮
天開圖畫賁名州茫茫往事紛蝸角點點遙山露佛頭

早晚擬尋三島去
忘機鷗鳥對沈浮

次訥庵記寒韻

陣陣雷轟又電奔
戕風聲勢傲乾坤
鋒鋷巧透重裘袖
埃漲平埋十里村
凍裂長河愁去馬
霜深遙塞阻來轅
夜栖幸借青州力
扶起炎劉莢二袁

次納清亭贈康上舍韻

占勝開軒豈偶然
霜松烟柳已多年
登臨正值隆寒序
談笑還延薄暮天
銀漢橋橫來二客
玉樓風迴醉羣仙
未闌遊興忽忽去
愁聽兜輿響擔肩

次湖陰韻三首

鄭士龍號湖陰

關河盡處值嚴凝
客裏流光嗣歲興
空院堆鹽三夜雪

前簷垂飭萬條冰窮貧酒戶從濡首白戰詩壇更惹僧
簪盞一堂肝肺照山陰歸興較誰勝

剪燈清坐覺寒侵撲戶春蟲攪曉吟擬上晴軒窮遠眺
且呼湯鼎做孤斟銷金帳暖豪兒樂鹽虎詩奇老相心
古戍殘更吹鐵甲多慚白面擁重衾

千里南州有古塵京華旅食幾回年早飛自愧搶榆鷁
鈍手掌朝上瀨船不分跛牂隨展驥枉從被毳道純縣
溪山一夜催詩雪聳盡空齋覓句肩

次湖陰龍灣楔帖韻

天低雨露班新瑞星聚檐帷候使輶仰斗才華聯儋相
登門聲價萃名僚留連夷夏橫分地斷送冬春代謝宵

身遠共驚遠故里話酸多是戀先朝登臨樽俎消駒
隙文字嘲諧盡燭條勝集有緣句已浹游蹤無定筆須
描編詩大手森仙列伸紙他時當簡招前袂猥蒙容謏
薄壤蟲何幸近冲霄

次訥庵元日感舊韻丙午春

採蘭欣有託側玉不辭頻對酌杯酣卯同盤菜啜辛
幾回交履烏時許吐車茵他日飄萍梗清遊記此春

入車輦北有飛鳳山南有熊骨山

輕蹄蹕入萬松中環擁軒窗翠幾重巨嶽北高回舞鳳
層巒南聳奮驚龍疲軀唇燥妨杯酒凍面腮梨怕鏡銅
收拾輿圖詩卷裏他時臥榻撫遊蹤

安定館遇姜翰林順之夜話次順之韻

順之士安字

離愁滿紙說分明披讀初驚子善鳴久矣未逢知者道
惠然方見故人情傾懷且喜樽相屬秉燭寧嫌僕屢更
千里此歡殊未數幕賓其柰趁晨行

鳳山臨發登栖鳳亭亭額乃龔天使用卿所書

臨行枉轡陟山東山上孤亭結構工飾砌碧陰松礙日
冰簾清籟壑生風能書有客題栖鳳解事何人爲樹桐
少立始知茲邑勝使君長在畫圖中

次權學官應仁韻

家在南中寂寞濱疎慵失學負青春虛名半世炊沙甚
遠路窮年食藥頻知友競嘲蛇著足家人應賦甑生塵

臨淵幾羨雙鷗靜養得煙波自在身

開城雜詠

瀑水天磨北奇觀久飽聞忙蹤辜試履列壑杳封雲騎
鶴知無分馳煙會有文據鞍遙指點費舌舊遊君

渡臨津

二月江湖水已生黃流渙渙簟紋平津頭檣暗須人艚
風裏樵輕戒路鉦兩岸沙痕潮正落一亭山色雨新晴
汧源聞說巖巒勝安得飛帆弄月明

自京發行到劔水道中有作示同行

馬首饒佳致追程迹未淹柳橫山澗碧岫露海雲天宿
醉身猶困春慵病更添奚囊空倒底聊用養吾廉

至平壤寄朴僉正仲忠元

一度烹魚一悵然，嫩人今日臥成川。
降仙島嶼清詩肺，浮碧煙波惱客船。
勝地相留吾已賀，故情伊阻子何偏。

春風花柳歸期近，莫用藏踪更踵前。

仲初以賜祭使從事先到關西未及

復

命以本道試官見留于西京前朔相約暢敘于客次及行到問之已避在成川又以書飛報不能留

符之意故書此答之

伴送華使于江上，回程義州牧使金醇之求詩留

別醇之伯醇字

三分界上此雄州，張弛才全屬望優。
門向北開欣有鑰，天惟西顧久無憂。
蓋傾數月同醒醉，袂判今朝柰去留。
地角豈容長斂惠，京華不日續斯遊。

聚勝晚酌洪參判退之金同知仲任兩使相金醇
之地主李學士伯喜話別退之選字仲任萬鈞字

東風笑我一春醒吹上雲間聚勝亭倚檻對斟新釀碧
隔林遙挹遠江青望來歸路山烟暝說盡離懷燭燼零
明日便成千里去東雲北樹兩冥冥

次訥庵葱秀山韻

雲巘騰騰驚浪溪橋臥斷虹芳洲春長蘚陰壑晚饒風羽
客松爲蓋馮夷石作宮浮華漫紅紫本色自青葱

次訥庵巖竇泉韻

旣愛林巒勝重憐石竇鳴跳輕寒玉碎響真古琴清欲
去心如繫頻來眼轉明傾螺時壁凍滿腹潤遺經

林畔館

海邦春盡老鸞花原隰風薰日自斜林畔有亭嵐氣逼
天邊無鴈路歧賒壓筵好客新仙侶滿壁清詩舊使華
爲把一杯臨勝境小溪回處露圓沙

練光亭

亭閒物表枕澄江風動靴紋蹙釣艫異域江山推第一
高人聲價久無雙魂憑虛閣飛三島氣吐長虹射八窓
天辦名區知有待從教奇事動偏邦

宿大同館

華館芳筵駐使華一軒雲月勝仙家街衢夜閨煙沈樹
庭院塵清露洗沙侯度拱尊天北極皇恩漸被海東

涯鄙人何幸叨迎迓收拾風頭寶唾花

泛大同江

津頭綵舸緩移東玉塵平臨鏡面空巨筆倚舷搜物色
神光照水走魚龍大同江古源千里平壤城寬鎮一峯
晚岸輕風軒客袖恍隨仙馭到天中

南樓獨眺

鉤上簾三面栖心曲檻邊山清來爽氣樹老立輕煙泉
送林間雨江呈野外天遙看疎柳下緩緩使漁船

見小艇捕魚

山外輕風送小舟雙篙撐入浪花頭何人要試橫江網
落日來驚宿鷺洲斫鱸已多休更打傾瓶未盡且相留

臨洲滋味輸閒手張翰歸心在待秋

有懷

山齋晝寂四窗開禽語喧晴夢自回沙岸漸高知水退
柳絲微動覺風來趁虛賈客迷江曲求牧村兒點澗隈
漫興詩篇誰爲和隔城消息思悠哉

晚步二首

輟簷推晚戶試纓過樓西壑靜風微響嵐深柳欲迷澗
流清遶石陂草綠盈蹊食糞農應惜畦邊見繫蹄
落日辭層嶠餘霞抹短牆崩崖沙拭白斷隴黍搖黃轉
脚危巖上追涼老樹傍奚兒昧幽興拙道露霓裳

送金華清三首

卓卓新羅老翰林樓高百尺俯當今孤身幾試風波地
萬事唯餘鐵石心北洞溪雲凝短夢上林松月倩清吟
平生作我知魚友最喜無機似漢陰

憶上伽倻秋已殘清溪響處振鳴鑾千巖錦綺丹楓老
半嶺笙簧翠栢寒偶爾失身嬰世網至今歸計負雲山
藤笻瀟殺輸君手月瀨風潭付往還

濡滯周南歲易殘心懸應復戀金鑾霜侵密縫催歸騎
帷下荒郵障晚寒莽蒼襄陽非枉路蕭條陋巷隔前山
行鞭莫惜勤相過白飯青芻待子還

晚出東湖

徑險緣巖罅泥深沒馬蹄江山殊索寞風雨更淒迷

影歸帆遠斜行落鴈低寒天容易暮宿鳥已爭栖

見李童子書屏二首山海

牧老文章冠大東流傳門戶挺神童垂髫便是窺牛虎
運肘驚看戲海鴻異事競喧寰宇內奇蹤先走道山中
醉顛濡髮還兒戲一掃懸知萬古空

蠻牋盈丈雪羞明大字如人信手成龍蹴層雲風雨急
劍揮晴晝鬼神驚江湖永侑羣仙會宇宙仍留後世名
想見天機初變幻短軀三尺走縱橫

北風

江鄉歲晏暮天高澤國霜嚴朔吹豪遠水捲沙堆亂雪
疎松摩檻送寒濤負暄坐客猶愁絕無褐窮民幾怨號

安得衢樽斟漢水渾教白屋醉陶陶

夜聞警盜有作

旱澇頻年歲告凶探肱俠豎恣橫鋒村墟守望寧容緩
晨夕傳呼不敢慵深壑數聲風外角高丘幾處雨中烽
沿江十里誰遑息民瘼無因達九重

梅雨

丁未

薰風來小塢細雨滿方池翠重籠煙葉黃肥綴露枝枕
涼聞點滴梢亞見離披潤色調羹美清香暗襲卮

競渡怨

康瓠被珍周鼎委淪向層淵魚腹裏宮中衆女競謠詠
在野蚩氓偏愛惜區區擬援漂泊魂千指不勸爭騰奔

情專百身不自己哀叫潮頭徹泉底魂兮焉歸不我聞
南風慘澹吹斜曛故國章華已遊兔江潯年年猶競渡
雙帆飯筒竹枝歌一死遺冤付楚些

永貞郡校生謠

山邑爭看五色麟橫金衣繡照青春才全文武蜚英早
運際風雲荷寵新鎖鑰昔聞驚北賊爰棠今見惠南
民秋晴原隰涼生袂攬乘詩仙筆有神

惜花春起早二首

窮日貪看興轉新踈簾鉤上每侵晨吸來清露醒如洗
刮眼鮮紅別一春

生憎昏靄羃芳新蝶夢纔回坐待晨莫怪韶華偏著眼

無情風雨不饒春

嘯臯先生文集卷之一

嘯皋先生文集卷之二

詩

酬洪宗百元海三首

甲寅

小閣虛明不用燈雨中交枕有良朋商量半月秋圍近
磨淬工夫幾倍增

連宵風雨翳殘燈喚起詩情對榻朋玉斗量珠知幾斛
碧窻清響曉來增

朝同吟硯夜同燈琢句相酬爾兩朋從此南征詩錄上
短篇長律有新增

昨晚見池魚有作

在苞山

夕照方池徹底明好看於初戲新晴揚鬣一一浮空立

駢首三三作隊行荷下細紋吹不定砌邊清沫吐無聲
區區尋丈窓前地九萬扶搖隔幾程

宗百遊毗瑟山寄泡豆

世間何事非泡幻糜豆功歸曉汲僧商略山家風味淡
一囊輸與臥雲朋

次東坡次孔毅父久早已而甚雨韻二首

咎徵遽傳幾旱溢十年人事紛得失子遺殘魂復罹災
未信天心解生物千畦殺青不待霜老農無言淚自出
種少來麤食欲盡富者崩心矧寒乞山神瀆靈飫邊豆
虐魃怒烏尤唐突二氣乖張必有自謾說邦家勤事佛
佛力果然益人國能使清朝賣官秩梁王未免五十步

有粟可移猶可恤官倉私庾舉懸磬徒手誰能救萬一
迂儒無路貢葵誠耿耿緘封空在骨方春風雨備調順
處處歡聲動蓬蓽農功垂畢稼如雲萬斯千斯指已屈
居然殃禍迫眼前邦本深憂係王室封疆警釁一時報
熟念令人心壹鬱朝來莫怪臥不起愁見東簷杲杲日
連宵暗響撒沙礫階下朝來水三尺淺澗衝橋已吼雷
濃雲噴壑猶潑墨驚看渾渾曲沼平厭聽潺潺懸溜直
閱盡農時方作雨老天此心吁莫測高卑無間一理通
不道蒼蒼九萬隔玄機謾秘造化權何裨窮民失耕織
空將碩苗畀炎火颯颯枯芟藉行屐屯膏枉待失望後
霈澤虛教塵土溺太史何時書有年當今民命真可憐

誰能燮理此陰陽
夏秋滂旱恒兩全
耕深耨易歲大熟
食貨四海流如泉
飢寒一沐飽暖春
豈獨專美斗三錢
傷今思古晚獨立
不敢罪歲矧怨天
先憂自有肉食人
禁中扶醉步花輓

贈毗瑟山僧希淵

時差試官將向江右故未句及之

青山近縣齋秋色滿
東窓山中百年僧
睡足聽寒淙放錫
偶出谷俗子驚眉
厖酌爾菊花酒一
倒磁鍾雙忙中送
渠還默默空心降
吾生獨何爲明發
凌層江

見仲氏病中詩驚喜之極率爾次韻

客宦樊籠鬱鬱然
歸心却羨翰飛鳶
飢鷹逐食投千里
病鴈摧翎臥七年
望斷不禁神獨往
思深無奈夢頻牽

忽擎鄉信交悲喜枕上幽愁寫在殘

贈黃仲舉

前後橫江幾丈深數晨贏得話煩襟莫言河伯誇秋早
應解行人惜別心

夜夜林梢月吐光參差冰雪照清涼
難人不識留人意
夢半殘更報曙忙

中洲煙雨萬垂楊欲折其如水
濺裳軒外竹枝聊把贈
此君能解保冰霜

送別

宣召催乘驛路車溪翁安得愛吾廬
金鉤塵拭驚湖鶴
雪榻聲停鎖架書前席蒼生千里近
登壇白羽兩甄虛

此行鼎呂關輕重手額都門幾隸興

十載槐安一夢餘歸來貧病兩欺余
筆鋒心盡皆青塚
經笥塵封付白魚
朽木自難施刻畫
冷灰寧復受吹噓
洛中匠石如相問
爲說山南老臭樗

題涵碧亭

柳颺金絲拂短牆
欄擎紅玉跨深塘
雙溪釵合仙源迴
疊嶂眉橫黛色長
晴夕疎櫺歌板響
暑天清簟舞衫涼
愜心佳致三間足
金谷原頭一醉鄉

鋤淨荆蕪樹曲牆
剔深沙磧梵方塘
魚游席下春波闊
林密庭西晚影長
夢斷月窻天易曙
醉餘風檻骨先涼
居然畫舫栖平地
病鶴歸來訝故鄉

歌謠

嶺南繁庶古稱雄
文獻風流冠大東
人器正須孚物望
諮詢今屬黑頭公

風謠採拾盛前聞
獻諛雷同詎足云
小子飽諳民苦樂
陳詞不敢襲虛文

東南百萬幾流離
旱澇殘生僅子遺
拯溺急宜施敏手
海堧磽瘠最難支

民惟邦本食民天
稼穡艱難最所先
逐末日多田野曠
不唯游惰在緇禪

東方鄒魯此南陲
士習頽波諒可嗤
德行文辭俱懶廢
硤開沈痼待神醫

不量肥瘠事豪奢誇美成風俗久訛攬轡要先明教化
驅民返朴革紛華。

風顛霆怒刷丁秋民血充填猾吏喉假虎黠狐誰斬頸
穴中贓賄積成立

列邑因循設市場南阡耘手半爲商探九殺越憑茲熾
匪直貪夫物價翔

島醜游魂未足虞不堪債帥剝民膚從今清鏡邊頭燭
少戢梟狼齒爪無

力窮財竭沸羣冤爭奪斯捱雀鼠喧奸伏摘來心自服
公庭應見碧苔痕

官厨列鼎勝仙庖方丈羅前簇膳膏對案須憐民肉剋

莫教州縣務相高

按使新臨競聳觀向來無此玉容端
莫作尋常彩軸看

寄濟民樓文會諸友

江樓高敞樹陰中多士同勤琢玉功
新詩吟罷滿襟風徙溟要擊搏鵬水對奕休彎射鵠弓
久擬一遊窺盛業十年誰記雪泥鴻

贈金司諱明南

農自號華南

華南明月暗中投此士如今豈俗流
送迎曾慣五窮留醉鄉天地深杯面
珍重傲霜根本在時乎環旦自清秋

贈性天師

文殊韻釋性天公忽漫相逢北社風誰遣閒雲離遠岫
自慚病鶴倚寒松披書問字從容際對榻交談寂寞中
苦索惡詩知底用一春重訪水西翁

太守以詩見招拘病未赴次韻以呈

甲子

新歲風煙官閣靜深杯相屬夜論情怯寒病骨門封雪
空想談霏寶屑輕

次太守遊觀韻十首

馬倅詩青壁孫公賦赤城不知長路險唯覺兩眸青山
色杯心滿霞光筆下生塵蹤窺甕牖空想畫中行

玉峯屏插鏡湖濱異境天留與散人泉石膏盲任冰蘖

屠沽酒食謾珠銀數間蓬戶人何在一頃山田草自春
猶有古松巖際立清風吹擺路歧塵

琴仙去後詩仙至石上義洋訪古音賡出兩章春雪調
臨淵細和老龍吟

昔年會上琴臺飲猶想江風萬樹寒龜縮坐炊深甑裏
清遊空向句中看

病廢詩書已罔功愁逢勑敵墮圍中鋸鋒悍鏃紛如雨
蝦蟇真成破竹同

身曾無垢要何洗枉向空山聽鳥聲地下硫黃多少在
可憐瘡痂億蒼生

客裝還渡桑乾水却望并州咫尺天蜀魄亦知猿鶴怨

月中催喚再遊仙

樹影盈階人迹絕
紗窗獨夜天清古
琴絃斷冷無聲枕
邊多少思和月一
時生惆悵蟾光圓
復缺誰將玉斧修
成淒風動竹颯然
鳴起來南望久山
水萬重情

嫩蕊濃花婉相對
清江碧石看更好
柳堤風過煙林雨
作遶樹春禽喧晚
座低簷晴月窺晨
宿佳麗中原地玉
奴絃寧王笛時在
春寂寞我有器誰
親滌柰花開山下
無人對酌破鏡翻
成今日恨孤燈尚
守前宵約可憐
兒願爾音毋金玉

蝦逐吞舟浪蓬依
蔽日陰違離嗟一
昨會合喜如今貂
狗知殊品頃簾強
續吟何曾辭偃室
妄擬識牙音

題孫丹陽汝誠畫魚軸

石底寒江滿尺珍
壁間清藻漾文鱗
王家冰上供親恩
程氏盆中感物仁
瞻戀心懸三百里
擴推波及一方民
白頭披對空含哽
惆悵當年負米身

謝地主惠片脯

德物分厨遠寒居
拜賜驚解包抽粉
板迎刃割松明佐
酒清歡溢加餐雋
味生何時重對局
展此鏤膺情

旅宿無寐追賦一路所見

鴛蹄羸臥強加鞭
西望長安落日邊
松菊故園秋欲老
祇應魂夢夜依然

右初發鄉家

石上開樽斫小魚
柳間維馬謗行裾
笑談一夏相從樂
陳迹悠悠俯仰餘

右仙巖贈別

行到南亭易感情
心勞政拙憶專城
至今愧悔山同積
把酒臨歧面色駢

右基川南院

連雲石磴幾羊腸
降倍登難背瀉漿
涉世極知行路險
愧將衰病試重岡

右竹嶺

彌原稻穗臥黃雲
南北豐凶一嶺分
吏散更欣公館靜
手談賓主對斜曛

右丹陽客舍

丹丘峽下馬遲遲境到龜潭更絕奇
只在此中多羽客
凡柯無路爛仙碁

右丹陽路中

山厓寥寂曾千載林下如今有一人
糞土浮榮唾朱紫
江山寶氣識金銀嶙峋峻壁峯峯直
蕪沒遺廬歲歲春
飛步只今風御遠傍江無處問清塵

右次黃江壁上韻

積石山難錮披榛徑已通郵鞭蘇倦脚
旅策利忙蹤人
意自清濁山形寧吉凶誰能剗疊嶂
妖喙一時空

右心頂嶺

中原太守舊情親握手平生鄙古人蠲擾撥忙纔半日

可憐淺笑寄深顰

全公舜弼時守惟新

侈客盃盤饒快果侵宵絃管動纖歌微茫十二峯頭雨
泥絮其如一病何

右宿惟新二首

彈琴臺上蒼松樹文物千秋往事悠未遂登臨愁過客
遐心付與岸頭鷗

右過琴臺

臨水依山幾百家利心江浪浩無涯近聞舟楫徒空簿
無乃巖廊有譽阿

右金遷

巖巖中流石滄波閱古今浮霜交激電正好月中吟

右月灘

灘惡名麻訖倉高見可興長洲船幾舳亂石浪千層短
棹隨波舞輕篙遇險憑臨深心自小尺地每兢兢

右可興

中流利碇閣行舫一望危途信苦遙不有商船能急難
千金性命一鴻毛

右苦遙灘

江村矮屋低頭入古壁塵煤襯枕衾轉輾爬搔供永夜
荒雞寂寞兩三音

右宿水上村舍

僧定何妨過櫓鳴鷗忘不復見人驚
愜心淨境回歸首
慚愧乘流趁利名

右神勒寺用古人韻

層樓一上豁乾端
虛檻偏宜拄客顏
十里滄浪鋪練水
萬年陵墓臥龍山
風帆幾片驚鴻外
煙樹千家落照間
一宿煩襟清到骨
夢中猶詫此身閒
畫簷秋影落中江
面面奇觀聚客窓
安得凭欄邀弄玉
臨風吹伴鳳簫雙

右清心樓用古韻二首

抹坤脩浦舊名梨
西望長吟有所思
枉費賈生憂國淚
百年平世屬恬嬉

右梨湖憶賢相慕齋金先

生安國

龍門山峻敞伽藍廿載難忘君美談我欲攀蘿尋勝去
轅駒無計脫重銜

右龍門山

水禽汙穢粉巉巖升精盃漿駐去帆好在西心灘上石
休將禍福怵庸凡

右西心灘

楊根西下喜流安天險還驚有大灘一葉梭投洪口窄
篙師絕叫瞻先寒

右大灘

深潭半道月溪長鏡面溶溶十里强臂力易勞難進艇

拖樓催喚替鳴榔

右月溪

渡迷還倍月溪深兩峽屏回擁碧岑一望煙波流渺渺
千尋雲日影沈沈窺魚水鳥浮還沒耽勝騷人醉復吟
岸幘微風襟韻快飽帆無數上江心

右渡迷津

鼎足三峯望眼中王都磅礴氣殊雄巖巖瞻彼興雲
雨幾決恩波注大東

右望三角山

送金生道盛還鄉隆

花雨濛春市松風沸晚岡歸心雲共遠離恨水爭長十

五男兒志三千弟子行指南
茲路直鞭策莫棲遑

送李君禮赴錦山二首義臣○丙寅

名郡湖南首錦山
銅章長鎖睡鄉關
震區盤錯知多少
利器胡然放著閒

平生湖海富軒昂
玉汝天公費主張
靜地好加恬養力
却要收斂舊鋒鋟

送金舜舉宰龍宮四首八元

水部郎官乞縣符
積誠迎養願還孤
萱闈幸隔牛鳴近
甘滑何妨接晚厨

食藥齋前馬骨高
見星衙下鼠牙牢
兩輪寬猛宜兼濟
莫向蜂窠縱老饕

履後方知答應難向來多是等閒看飽更齒舌叢中過
迂拙如今愧滿顏
取快斯須悔莫捫區區在特并蛙尊平生妙劑吞難下
含忍謙虛此兩言

蠹石餞筵和答李陶丘贈別

濟臣

驛召詞臣集上都儲材應接信嘉謨病夫在被虛名誤
樗散何曾繫有無

陶丘欲賦詩請妓展紙且乞伴宿因戲呈一絕

香指纖纖展雪牋頻揮醉筆氣騰煙清狂可敵千金笑
好伴劉郎入洞天

初發晉陽道中有作

千里 王京路三年客官身
驕炎陰再伏孱骨病相因
古院盃傳急重岡馬蹟頻
曾中無滯芥何往不通津

十九日朝雨

丁寧我僕戒晨興不柰頑陰未解晴得坎何人知自止
今朝又作荷蓑行

過安平嶺呈彥晦兼示澡兒

彥晦字春蘭

陰曠崇朝日色微風來馬首挾霜威頻經坎窞長兢戰
始覺身由曲徑非

次矗石樓韻九首

朗吟南嶽寫澄江筆下星芒射畫窻第一名區無間選
風流雄渾始堪雙

石城如虎臥層江危檻橫虛護水窓百里煙雲朝席下
一吟乾盡卯盃雙

虎符玉節集南江鼎坐高談振瑣窓赤壁舊無樓可倚
黃泥今有客來雙

爽氣侵肝怯近江退燠冰背伏煙窓清遊已覺仙凡隔
擬律甘浮太白雙

潢潦涓微望淼江壩麈吹近接霄窓一家共被登門幸
螺贏螟蛉在側雙

客裏腸回九曲江夢魂長繞舊螢窓歲華吹盡霜糊鬢
誰遣跳丸走坂雙

瓊樓簾影枕平江方丈螺鬟擁四窓茲地足稽天上客

昨來飛下繡鳬雙

飲轟周斗挹春江吟暢晴虹貫夜窓餘響隨風落塵土
玄花驚刮病眸雙

大邦吞納盡三江襪線區區事斷窓濃抹淡粧饒態度
東家強蹙醜眉雙

無題

靈城玄圃昔留連兩地山川尚宛然唯有病翁雙鬢色
添霜非復曩時玄

塚樹枝向南

戊辰

西湖湖上墓上樹樹樹枝枝皆指南無情植物有如此
逝者精忠猶可諳英雄生值世運否存亡重寄身獨擔

天崩誓將隻手擎事左一夕歸空談黃壤難埋化碧血
忠憤拔地成松栴年年雨露培正直條枝奮揚橫晴嵐
回虬屈鐵注山陽彼南一方奚所貪南方有國國有君
葵心傾日難自堪讒鋒縱殄許國身豈以生死懷二三
貫金純誠托脩幹漫山箇箇梢頭含轡向平生愛戴處
泉下枝間兩無慚燕雲無礙若避臭猶恐腥穢來相參
當時得聞復中原托根拱址誠所甘通天遺恨寄樹木
分明此意誰能採嚴霜酷雪幾百年依然寒影跨前潭
荒涼石獸草離離水光山色吟思酣包羞浪迹南枝下
至今冷笑吳興男

鍾馗捉鬼圖

天門一朝掛金榜書生性命拋丹墀泉中猶感祔葬恩
圖報一念天應知華清浴爛寒熱作玉几倦睡昏宸思
虛耗小豎敢跳踉擲及玉笛肆竊吹夢裏雷霆奮未擊
禦侮武弁來何遲忠肝凝碧尚未朽試效舊誓其在茲
藍袍破帽忽軒騰已覺霜風吹殿帷倏閃妖魅膽已破
束手委命歸提撕雙睛已趁一抉盡腦裂髓剝看成澌
有如快鶻下層空翎翮電掣鑿狐狸勁爪雄牙恣啖嚼
揶揄奸黠靡所施醖鄒聲斷帝心爽清問亟逮敷忱詞
溫顏載嘉復載悅嗟爾寸誠能至斯當前斬邪已足快
矧伊邁厲隨清夷覺來眷注頓增篤要描儀像留神奇
妙筆揮時天誘衷神會宛若親見之毫毛不爽在綃面

精靈穎脫非人爲世間奇事有如此目擊遺狀悲當時
荃心欲醉美疾毒大器竟將輸胡兒廟朝忠讜豫寵遇
庶幾出手扶顛危天公先事示驚悟假托夢寐昭箴規
昏冥不省社稷計謾對圖畫終何其流傳間閑事襁褓
年年歲首裝門楣千秋長作百鬼雄喙矣奔避紙上魑

謝全君俞送魚

舜輔

鮮鯽銀鱗喜滿盤故人佳惠越南山和冰斫出千霜縷
箸入蔬園逼骨寒

龜臺觀漲

白水縈林鶴頸長高臺幽眺屬昏黃臨風少駐扶歸杖
且看浮雲變態忙

贈僧

何事勝無事晴雲在谷中
亟收塵土迹歸對舊山容

讀近思錄

欲檢吾身應有道近思須讀聖賢書
從前病在詞章習今日方知樂有餘

應製慶會樓觀射

黼座初開禁苑中羣貔決拾陞西東
育才盛意兼文武講藝平時法祖宗
所貴雍容能反己非徒審固問持弓
從今感聳干城士永矢忠勤不尚功

觀光錄

呈李書狀博祭

濟臣字夢應

枕煖月窓三燦者盃深雨幌百中之風流輸與分司盡
愧向花前撚雪髭

浮碧樓次李書狀

濟臣

吳方伯祥韻

進進巖回蓋登登露洗缸高筵開霽日虛檻跨平江翠
樹凝煙浦黃花媚畫窓難忘此歡賞歲序屬徒缸

浮碧樓席上

危堞環回一水流平原目斷亂峯抽島如長舌彌江口
樓似粧眉展石頭古寺僧殘嗟往事仙橋雲白又清秋
樽邊歌鼓晴雷殷麟窟癡龍識壯遊

主席相公篇中屢示燕薊之行之苦慰藉甚款聊
拾蕪拙約同行李書狀同賦

觴飛膝促酒如流興逸詩顛筆屢抽此去悠悠隨馬首
那堪耿耿在心頭
紆台念形言地頓豁羈愁客路秋
憑仗歸來保無恙春冰未泮續茲遊

昨者冒呈荒拙未見瓊報敢以戲語爲媒督之

黃岡

妓例不許渡江以西今行有微服過江之事故下絕云然

浪浪清響滿前簷簾幕深深睡興添
十二碧峯迷楚夢
行臺無地弄毫尖

客子車中暗入秦關中權柄坐輸人
方知天塹非眞語
赤壁南軍已奪津

次書狀韻

廬山誰慕釀盈缸冠掛東門肯學逢
身際明時難問舍

心如暗室未開窗簪紳已忝陪鵷列軺傳今叨越鴨江
程迫却嫌陽候早旅遊欣與李君雙桃瓊酬報傾中肺
花柳迷顛歷塞邦錦宙鶯癡遲疇曉黃岡仙下不驚侏
秋風江館輕寒透夜雨晨簷暗溜瀧導意詩能增繾綣
澆愁酒解洗紛囋一身纏欲斯爲險萬里前途此可懣
忘返恐成他日累從今步步履危砭

戲呈書狀一粲

箕城當道風流陣欄截謀深借酒兵可笑鴻門猶劒舞
不知函谷已雞鳴浸冰瓜蔓醒春困收鬢衣纓繫寸情
從此一戎功底績關山千里付橫行

次書狀途中韻

皇風無外萬邦寧不隔東川赴海程迢遞西關馳使節
紛綸白羽開郵兵杯盤戒切慮傷性枕席防嚴爲蕩情
唯有琢磨風月句最宜三伴入燕行

次百祥樓韻

浙瀝秋風曉滿樓漫山黃葉雨初收怯寒竟日深帷裏
戀景來朝古渡頭切漢危簷翔碧落護城層壁擁仙舟
忽忽未暇窮三島清唱空聞帝子洲

次控江亭韻

亭立蒼崖欲盡頭黃花赤葉媚深秋輜車薄暮隨鴉至
短棹寒汀傍鷺浮觸物何曾悲落木濯纓還喜有清流
鴻泥忙迹無人記書向風舷等刻舟

數日睽違匪直傾慕弦心兼以瓊玖之阻爲嘆今
相聚累朝我心則降而江錦之裁收彩不發殊非
所望於左右敢先瓜投以希破慳

分手中歧渴在腸半旬仍見祕清章旣多惹起心中客
不耐還令古本強雨後風淒醒客夢霜餘雷輒撼吟牀
幾番獨撫絃洋調却惜流傳俚耳傍

時適風雨雷鳴

獨坐無聊呈清心高會博粲

抱州城上統軍亭千古關河擅勝形詩眼一明疆界闊
筆頭濃染鴨江青

登高會酒半酣成一律奉呈使相主人兩令公分
司亞使二契史求教

亭高聚勝控雄邦張目令人久倚窓翠蓋參差橫遠隴
玉虹彎屈送清江客中日月重逢九手裏杯觴各盡雙
有意西風吹老帽欲賡唐調不成腔

次書狀統軍亭韻二首

崇丘基傑構形勢稱名城入望關津拆平看島嶼縈燕
雲秋氣迴瀚海夕陽明却喜鄰辰極深添拱北情
地盡成殊險天虛氣益清江山分表裏亭觀賁昇平遊
遠追司馬鳴雄鄙兩京老懷灰不起無計接飛觥

次書狀因怒有悔吟

當怒何須強矯真霜威峻整匪謀身克從難克醫偏性
自警名言好警人

昨朝飯罷見在陋寢追說前夕渡江之景答以一語
便默而止心竊怪之而未敢問馬上覺得殊有可
笑者蓋夢應樂道月光之好說道當時清致且語
有來脉意味深長而僕反歸美於蘆葦之長蓋俗
語蘆與月同音不同聲因鄙見之陋重聽之病而
交誤之也今夢應以暴怒爲悔深有愧謝之意余
既有此失將自謝之不暇故又步前韻以開慰焉
將蘆答月僞酬真到晚方醒汗滿身一病平生同許吏
不無諸已敢非人

次書狀九連城韻

追記越江之興

飲罷離亭酒宵辭義順城馬穿叢葦密月映遠津平客

困忙投店兵寒開下營嚴程從此始一劍斷鄉情

松鵲山

稜稜瘦骨雲霄外挺挺奇姿客路傍絕勝統軍亭上望
森然面目見開張

長湫道中次書狀韻

石徑愁雙嶺輿梁喜八河詩情秋色老客思夕陽多老
骨肌全瘦寒廳寐易訛春風欣繞筆一座飽陽和

次通遠堡韻

孤城當近虜一路貫全燕墟落依橋畔橐韃列馬前身
疲知蘄苦心硬匹金堅安用腰間劍詞華射斗邊

踰高嶺

踏盡遼山此嶺高
巖崖粉飾雪新韜
橫穿深樾羊腸遠
直注長冰玉板牢
歷險蹄顛雙馬汗
扶危力極衆兵號
自慚白面微髭技
安坐憺帷尚憚勞

次書狀高字韻

高作高如高嶺高
快揮長劍奮龍韜
自知險韻同清水
強嚼辛椒羨大牢
涇渭兩流容會合
天人三籟各鳴號
一山一水添凌厲
欲效西轡不亦勞

次東昌堡路中韻

御募王尊叱途非
阮籍窮削堅成堡
障渚塹截奔衝勢
屬關防緊功歸物
力雄晉家無內釁
何必患淵聰

次宿西平堡韻
即沙嶺

緣底名沙嶺潢汙四十程艱投郵館宿喜絕夕烽驚坎
止知吾道逢飄笑此生 國恩涓未報不敢憚遐征

次清氛亭道中

昔未經艱險今方憶宴安將身驅遠道何日卸遊鞍問
店忙宵息循牆避暮寒霾雲凝欲雨客思浩無端

留高平次書狀鎮武堡韻

天氣還須閉人生固有窮囊空愁迹滯裘弊奈寒衝淡
日輝輝晚寧風陣陣雄戢威憐遠客心禱上天聰

元韻

濟臣

過夜風兼雪凝陰歲序窮遠天行欲盡長劒氣彌衝
控呃城池壯猷爲力量雄人和存堡障祈父免呼聰

次高平城始見醫巫閭山喜而有作

萬古幽州鎮廣橫漢虜間曾聞鍾老賀今得仰高山秀
色明千里雄威壓八蠻山靈應許我此去好回環

廣寧

留日適習戰馬市馬市在
北一息許教場在南門外

一方雄屏翰十里接蹄輪粉抹城千堞雲埋瓦萬鱗胡
駒來北市雷礲動南闌柱昊閭山碧聊寬客況辛

夢應過楊將軍祠有作辭奇而韻險邈不可攀敢
於所押之外拾其餘字艱成十二韻以免逋責

飽聞名籍籍虔仰廟潭潭座配挈熊士門嘶噴雪驂英
雄猷克壯忠悃面無慚鶴野宣威重冰天幾戰酣百屯
三箭定千敵一戈戡頽叔旗方舉孫堅首忽函鏤銘吾

背在麋粉此心甘但使遊魂脫應猶宿憤舍宏材今代
罕名將古人叅畫壁標題別勳庸指點諳雙碑旌淑額
萬口戀賢談讚詠逢豪唱難廢政類暗

次上使山海關韻上使柳順善

山作墩臺海作壕要衝設險特雄牢近無狐鼠窺重鎬
昔有鯨鯢戲怒濤躡籍戍丁防孔穴佩繻行賈檢錐刀
治戎有策人和在休恃金城百丈高

次書狀望昌黎山憶文公韻

風雪并遼我佩寒詢今訪古經躋岢奇蹤未遇山海間
意緒索寞思東韓韓山卓絕忽聳看上連北斗橫邊關
唐家儒老此發端遠源淳瀦成層瀾乾坤浩氣充肺肝

直槩振世消黠姦奔波二氏聚成團奮臂攘斥忘身單
舞階要贊格苗頑殷鼎誰試調鹹酸五窮長伴轉身難
全其已毀吾事完文章直挽三代還道德幾與醇孟般
無情拳石側羣山一望不覺興永歎當時富貴霜葉丹
蒼崖萬古無愧顏

次書狀過孤竹廢城韻二首

竹死餘孤節層岡擁古基得仁推位士扶義救民師
老山西地風清歲暮時道傍碑二尺霜雪政交吹
倫爽終教國勢輕子須尊父弟尊兄曾經雲谷分金稱
誰訝窮天恥粟名

宿永平府

凍滑驚蹄雪滿衣雞栖猶向永平歸軌通環隴
如擊毘聳華譙翼欲飛附郭人烟羣冢開行厨草具一燈微
臥思泛梗三千里燠室頤病願已違

次書狀薊州韻

赤心腴腹塞酥傍夜棧鈴悲雨斷腸巖邑當時蓄羯虜
石橋千古表漁陽醜聲未徹雙聾耳兒戲終成一笑場
逆穴陳蹤昭後鑑太平煙樹老蒼蒼

到豐潤不許入城未卜安下處久立郭外用前韻
雪後冰綃作地衣馬蹄橫踏素花歸門焉有禁難衝突
夕矣無依欲奮飛天子尚容班咫尺縣官奚獨視卑
微遠人館穀斯王政深訝如今與古違

謹次金蘭作契韻以塞勤教

時時紅袖醉流霞
日日黃埃困老騮
只恨溪山青漸少
不知鬚鬢白幾多
龍門何幸風儀近
馬上都忘道路賒
萬里歲寒同苦樂
願安承教也非他

次書狀玉河館酌月戲賦韻

心遡長天遠
身縻玉水堤
深杯邀月色
爲愛照東西

送李伯胤令公出宰真珠十韻

辛未○伯胤震字

世事隨棋局
局翻閱年三十幾
人存驚帆竟脫風濤險
枯草重霑雨露恩
入手一麾辭北闕
登途五馬指東原
雲低嶺嶠晞晴雪
天闊溟波浴曉暎
太白霞標供柱笏
竹西風籟惹開樽
山儂土瘠艱生業
海戶年饑半死

魂憂樂後先君子志公私緩急昔賢論離亭遠送車難
輒禁直相從席未溫浪迹不須悲聚散深盟唯擬保寒
暄強虛枯硯貽情贐寄浼清裝愧贈言

雨後行巡有述

冷雨支離不肯晴報晴還喜暮鐘聲衝泥倦脚雙韉重
斂靄遙空片月明寂寂廟庭人語靜陰陰宮樹露華清
誤叨恩幸慚餐素偃仰田園耿寸情

次韻奉答瑞仲彥深兩年兄六首

瑞仲蔡應祥字
彥深金潛字

世事居多與願違七星環聚詎非奇老懷感舊全披膈
樂意乘酣共展眉托契已深驚歲暮盛筵當再擬春時
裁詩斗覺相思切履舄如聞響石墀

正喜溪居不遠違，惠然跨馬一何奇。
方將野袖揮官閣，偃蹇霜鬚映畫眉。
拚得異鄉同榜會，值茲翻雪亂風時。
勝遊陳迹隨年換，病鶴依然傍砌墀。

長宵何物撥心灰，旅榻還要一笑開。
夜色復圓西海月，春光旋阻北枝梅。
親疎衾枕悲歡夢，生熟顏情冷暖杯。
今日送人歸故里，荷君遙遣好詩催。

平山村裏獨眠翁，公館風流興未窮。
收拾去年行樂事，新詩飛入簿書中。

招得田園偃仰翁，深樽密席任歡窮。
祇今追憶顏猶赤，多發狂言爛醉中。

天教星聚四三翁，聚欲無離計亦窮。
茲假丹青留往迹，

永言相對一屏中

海州芙蓉堂契會二首

芙蓉堂下滿池蓮紅白交加共粲然物色最宜今日飲
盞簪庚子舊同年

七星今夜會西州叨主邀叅愧白頭盟到歲寒中更好
百年奇事畫中留

答南景祥夢鰲

短翮摧頽久失翔無才補袞老堪傷禮羅春設披雲翼
繪繡虞謨講要詳

覆霜堅冰至

坤陰隨序亦相承昨夜金風氣始凝峯腋旣驚寒結露

澤心旋覺沍成冰事從兆朕宜觀漸勢至滋蔓詎可勝
萬理細推渾一揆義文千載照明微

聞女奚吹玉笛有作

玉龍腰細月邊橫春筍忙時鶴唳清謝盡伶門諸老手
停杯相對坐深更

慶會樓卽事應製

癸酉

萬木離披錦葉稠夾城清氣屬高秋縱橫戰蟻花生筆
左右轟雷雪擺幘文武英才須獎育國家長計在蒐
求聖明法祖勤臨御益樹洪基永世休

月城二首

甲戌在東都

築斯要捍敵兵緣神器終輸種稌田蛟水未流淪喪惡

雞林空想降生賢興衰幾激遊人感芳臭時憑野話傳
半月已傾孤作主彌眸蔓草帶寒烟

萍迹東浮豈有緣故都風色黍離田成城反促斯亡禍
設險爭如所寶賢歌哭遺墟知幾變祥殃往事問無傳
客懷俯仰斜陽裏鰲岫愁容樹樹烟

臨海殿二首

平陸成江想渺然居人猶指路傍田池臺歌吹千年迹
畦畛犁鉏一望阡魚爛誰憐塗地腦燕安嗟昧燬堂烟
書生獨抱憂時念感慨盈懷立暮天

郊圻濱海猶嫌遠開鑿城頭幾頃田役志禽魚餘茂草
從流舸艦但荒阡如何溟漲千尋浪不救兵焚一炬烟

指點舊基空撫迹廢興真箇不關天

瞻星臺二首

安得人生如汝壽直從羅代到今辰打殘羯鼓皮穿面
酌盡衢樽酒涸鱗徒勤蠹石成崇觀不解徵星在庶民
當日遇災能警懼豈應忘國又忘身

鍊石束成觀測地偏邦猶解謹三辰燭當風裏爇無焰
龍起田中望認鱗枉費管窺推遠象不知天視自吾民
當時故物消磨盡千古乾坤獨立身

鳳凰臺三首

江東風景喜符名超出塵紛發興清便服登臨消暇日
半間談笑撫全城萬家煙火供凝眺百里山河暢遠情

誰鑿西流匯二水醉看翻浪夕陽明

新臺晚出擅嘉名天畔風多越樣清荒隴一朝成勝境
危簷三面壓層城瑞禽難覩悲哀世浮蟻催傾爲旅情
能賦登高今有手地靈聲價更分明

高臺不見鳳凰遊李郭云亡歲月流千載登臨重起感
鳳城詩裏古今愁

除夜次琴叅奉夾之韻四首

夾之應夾字時守
集慶殿

家家斂酒待來朝一歲光陰祇此宵不耐寸心搖未定
旅情鄉思兩攢攢

天時人事日相催出地三陽又報回客土微君誰晤語
同消羈恨仗深壘

衰頹心力悲年邁奮發功程負日新五十八春虛度了
屏中慚愧製箴人

坐逢佳客免孤斟醉興翻成陟屺吟顧我彷徨風樹下
感時徒覺愴懷深

續貂呈相公兼奉座上諸知契

誰琢寒巖插水心俯來三面鏡光沈長林遠岸圍秋色
濃靄層城釀晚陰紅袖好催文字飲鳴琴欣寫旅遊襟
風流故事中追挽勝集年年又自今

次夾之韻

流年世事兩悠悠旅夢偏尋舊釣遊客裏知音從事在
一團和氣壓千愁

田園回首去程悠五斗欺人逐宦遊相對此時無一盞
其如風雪歲寒愁

次仲氏韻二首 丁丑在江都

斷鴈東西各一身幾回岡上望瞻頻連牀永夕纔開抱
分手斜陽却慘神京輦煙塵多樂事海天風雨祇愁人
西門咫尺難騰踏轅下駑駒愧繫馴

自嗟鳩拙拙謀身到處羈愁感歎頻赤葉黃花今改月
長山遠水久傷神一錢不直宜收迹五斗何關解誤人
覆下有霜猶未去客中冰雪坐將馴

江陵校生歌謠 爲仲氏作

玉節自天臨出日霜威搖嶽懼偏方名區昔號神仙宅

瘠土今成病弊場學校草蕪拋教育田廬民散閱饑荒
百年學道逢君子喜續風謠勿拜章

伏次仲氏韻

戊寅在驪州仲氏在江陵

東望悠悠我思多江樓煙月不遑誇却忻江水源流接
雙鯉時時受晚叉

謝申生員僭葡萄

清水凝晶箇箇圓山家仙味奄來前文園不爲琴心惱
塵土渾腸要洗湔

流頭之會偶欲共滌駿奔餘困不意梧亭丈人聖
得知之委送肉竹一坐驚感以爲奇事近又傳來
五言唐律一首曲盡當日景況乃知閒中吟嘯之

興又復不淺切擬因此捧心庶得少效傾荷之情
而調高韻強非久放筆硯者所能攀躡頃嘗俾候
答簡又示覽寺舊約且慮缸面風味之變令人躍
如而非直積漲難越賤疾亦重坐孤盛意心之結
矣如食未下累日綴緝僅賡清製兼述卑抱用博

閒中一哂二首

邀牀鐺脚聚執執俯平湖衰鬢皤皤鶴佳賓泛泛鳥羈
懷聊共遣塵綬苦相紆歎羨梧亭老風窻嘯詠娛
赤壁佳期過流光失泝湖煩病妨泛蟻炎潦阻趨鳥望
眼雙花爛愁腸萬緒紆秋天會澄霽共辦一場娛

凝石寺唱和二首

庚辰

千里山河兩眼明一軒談笑百壺傾
居僧莫怪今宵話
螢雪相從十載情

坐閱人歡佛眼明能挑客興
瓷頭傾高談到快多新興
樂意增長挾舊情

書凝石寺僧詩軸

披草驅牛冒雪風一方襟抱喜來同
百年勝集度南至
記向居僧短幅中

觀漲

辛巳

入春今幾雨竟日又連宵
雷怒車催鼓龍馳鬣注瓢徒
聞聲滿宇那意水翻霄
推戶天迷眼登山帶暇腰
懷山傳往事競渡說驚潮
旁浸餘威極先驅遠勢遙
月弦看

古岸虹斷報前橋漁捲孤竿餌農愁百頃苗朝宗知有
路泛濫慮生驕八九吞雲夢從他小草漂

春寒

風翻亂雪漲山門奪我幽愁一室溫惆悵三陽應失柄
強煎村酒度晨昏

盆松

尺許雙根壓一庭冰霜無恙舊年青怯寒好笑溪邊柳
生意春深尚杳冥

煎花二首

雨後春山錦繡香天教仙餌潤枯腸清油煎出和蜂蜜
箸子拈來好侑觴

煎成鬆片嚼紅香收拾春光入肺腸俗物豈宜來配合
須傾竹葉百千觴

辭醴

特樽誠意屬尊賢忘設君心已變前介石不曾終一日
晉靡安得語同年

思子宮

悔念萌中晚築臺驚魂已散詎能來誰知湖上隆然土
曾積劉家父子哀

至天臺三首

春風吹我上天臺脚下青林夾水回興遠擬追沂上樂
詠歸還喜冠童來

南山山上水邊臺牧豎樵夫日幾回
仙景好將塵眼洗我今攜友一番來

惜春扶病強登臺獻狀溪山表裏回
醉面欲涼微雨過舞衫催舉好風來

奉答任卓爾夢中青眼之述

卓爾屹字

山齋既月共松風何意重叨夢寐中
所愧枉勤懸想念貧無寸錦乞江公

次卓爾韻二首

摸索暗中吾視眇虛拋六十四環星
丁寧竹牖開須早寶匣遺音沂考亭

百昌闢發春宵雨意思先從客感生
嘉種却憑耘養力

勉加弘毅畢功程

行淳詩軸次退溪先生韻

壬午

嶺外迎梅積潦天風軒晚霽坐隨緣滿庭空翠西山色
更喜僧來跪檻前

次南景祥

剛州北里南夫子講榻陵莪七十徒四座佩衿彌水次
九秋霜日豁天衢儒家事業書千卷師席風流酒百壺
盛美起人忘老朽欲隨羣彥究工夫

題李庾林亭

山到溪回取意成石癯松老矗亭亭神慳勝致圍樊護
客怕塵蹤破蘚行疊嶂霜深秋獻狀層臺樽滿水摸形

主人鄭重要題品造化奇功孰強名

次南景祥贈別韻

南君能愛我別酒瀉朝陽猥荷恩綸重其如學術荒
朔風當面緊西路入鞭長旅館難消遣相思夜月光

奉酬南景祥知契相送以詩

乙酉○景祥時在金海翼舍

檜山山水失澄鮮病守尸官只食眠老木難雕依舊朽
繁英有爛競新妍餘生足踏言歸路肆赦恩同罔極
天憂患叢中思報國奄奄情緒兩茫然

野亭獨坐行衲投紙書所見

長夏孤亭送火流羣巒四衛一溪曲朝晡變態幾陰晴
天自青青雲自黑

重陽翊日次子悅仲氏贈別韻三首

未篇稟問月
再會之約

野花楓葉鳳山秋
好事佳辰兩到頭
撥置百憂開笑口
長情短晷夜相酬

陟岡瞻望幾三秋
風雨溪堂喜聚頭
友愛百年如一日
此生無計此恩酬

兩番佳節一番秋
晚菊何妨上老頭
天爲閒翁添逸興
丁寧厚餉要重酬

書性澄軸

痰嗽人盡病老夫
尤不支咳咳倚朝枕
有僧來索詩贊
以十五柿似非山中宜
汝旣年尚少云與道
盛知去去探腹稿勿苦
老夫爲

道盛金隆字

仁宗大王挽章二首

春宮三十載世已望唐虞道德元純亦文章更煥乎辰
居中始建風動化初敷必得終虛語烏號墮鼎湖
時雨均生物微臣濫異恩從容陪講幄密勿聽綸
言未效涓埃報空餘血泣魂無才摸日月長慟向山園

挽南學正崧

丹旌一片返鄉閭浮世功名萬事虛父母俱存千里外
妻兒異處八年餘士風歸厚鳩哀賻國典推恩護素
車四紀風燈何倏忽蛛絲空鎖舊詩書

挽尚牧申潛

夙歲雷車轉蓋世名芹宮閣步冠羣英翰林風月曾槐國

鈴索弦歌幾武城物論攸歸躋峻級年華催謝罷長鳴
商山四境菁莪樂煙鎖書堂棟已傾

挽柳舍人堪

賦鵬身危喜脫樊搏鵬路遠遽升魂黃壚忍掩衣冠偉
青眼空懷笑語溫濁世悲歡幾寒暑浮生脩短一朝昏
秋風不盡公私慟尚幸新枝出舊根

挽李參判濯夫人金氏

亞卿風節聳簪紳配德詩賡舊采蘋石下井中無妄禍
鸞悲鏡裏未亡身運迴更化幽冤洗官及遺孤 寵命
新報向九京情轉急不遑留待望雲人

挽琴生員軸

學士高風幾百年流傳門戶再鍾賢夙成敏妙天偏賦
旁播聲名世孰先安射易封奇李數俗朝難解草楊玄
名騰鶚薦朝旌晚計熟龜藏野性全安樂窩間今邵老
逍遙遊適兩莊仙哀音獨叫分圓鏡穠蘖孤萌付舊甌
甲子紀周還指屈嘉平朔肇遽舟遷人空鄉社誰調釀
表去童蒙失喚眠誘掖恩深懷少日追隨契切慟幽泉
芙蓉臺上吟魂冷落月西風我思纏

退溪先生挽詞二章

安宅成空正路蕪帝憐斯世界醇儒窮探閫奧臻純熟
開示旨龔識步趨斗仰羣情方歎遠山頽一夢遽徵符
晚年丘壑平生志短碣千秋馬鬣隅

螳堙徒勞企冢巔鵬溟何擇納微涓芝蘭未化情彌篤
糞土難朽脚不前門戶崩心亡大老鄉邦議祀屬先賢
深追不屑丁寧誨鉞頂恩存骨已鐫

挽李參奉容配金氏

光金鐵李兩名門一賦于歸萬福源君子奉承宜酒食
家風完盛好田園頽齡不柰滔滔水餘慶須看蟄蟄孫
津劒載逢應自幸生人慕戀獨摧魂

挽柳監司太浩

景深

少日心期指歲寒幾番雲樹杳關山昂霄材大頻承
寵附驥蠅凝晚側班北極趨衙欣接舄西門上鑰苦
分顏那知風雨招賢夜萬丈虹收蓋客棺

挽張袞仲母權氏

不櫛茹蔬八十秋鏡中寒影一生愁朝來草谷南溪側
哀挽聞歌古栢舟

挽金生員士明

文節清門亞質夫名昇璧水手桑弧剛腸成性推鄉曲
懿火埋頭哂俗徒命矣斯人歸土壤天胡於世壽屠沽
風燈周甲殊忽卒眉白氈青屬小孤

一時門戶數全金曾喪天樞已隕心君既不留今掩壙
我將何所更開襟抱病未執霜中紼忍淚空題紙上吟
從此播文丹水左清風無復響煙林

天樞生員
全應斗字

挽柳知事潛

騎曹烏府遞高騫貂首金腰賁異恩積悃 寢園三載
守酬勞爵 命六卿尊人間七袞兼諸福堂下雙男更
九孫翰苑同年今幾在追思平昔倍摧魂

挽李監司仲樛

汾水源清濯肺腸明時臺閣好騰翔龍龕巖有子推眉白
善谷多賢頌髮黃興孝幾城毛氏檄分憂一路召公棠
屋山幽宅平生計煙鎖林亭舊醉鄉

挽江華府使全聖俞

彝弼○將赴春
川故末句及之

少年膠漆幾同裯中歲參商苦遠遊我愧糠前空進退
公拘器晚飽沈浮歸來貧病村墟寂痛迫存亡夢寐適
未奠一杯謀食去幽明回首此情悠

挽亡室貞夫人權氏三章

結髮爲夫婦今垂四十年關關情自至
歲歲翼翼相連遊
宦交貧病衰遲仗食眠一朝相捨去子立向南阡
閨計緣吾拙持家恃子賢教兒俱識字養女各移天
達去窮依舊憂來樂不全念頭多少事抱盡向重泉
偶爾相違遠那知永訣忙半生恒抱病一夏劇增傷
隔面幽明閉終身痛恨長依依追笑語老淚瀉空堂

挽鄭承旨子中

惟一

太白山尖洛水清精靈萃止挺時英胡然駿足臨長路
遽爾蘭馨折半莖幹蠱眼前餘稚子留皮身後柰虛名
平生門契忘年久忍送孤旌返故城

嘯臯先生文集卷之二

Handwritten text, likely a signature or name, written vertically in cursive script.

Handwritten text, likely a signature or name, written vertically in cursive script.

Handwritten text, likely a signature or name, written vertically in cursive script.

